

ցում են ոսկեզօծուած պնակների մէջ, փղոսկրէ դգալով, ու չգլտես, ուտես թէ՞ նայես :

Բառը հնչում է, սիրուն ժպիտով կանգ առնում եւ, լաւագոյն պարուհիների նման, ոտքի մատների վրայ պտոյտ գալիս, նորից պտոյտ գալիս, եւ բարեւում : Ածականների երամը աննշմար կերպով ներս է մտնում ու բեմի ներքնախորը, արհեստական, գոյնզգոյն լոյսերի տակ հազար ձեւեր առնում :

Ջութակների թաւշեայ ճպտոսների տակ հառաչում են, մինչ սրինգները մելանոյշ երգեր են երգում :

Վերը, կովկասցի հանդիսականներ, նայում եւ սուր ակուաներով բայերը պատուտում վայրի խնձորի նման :

* * *

Ռուս վախտականները արշաւել են Պոլիս, ոճաւորել Պերան եւ ամէն բանի վրայ ուրոյն կնիք դրել :

Պատմութիւնը ի՞նչ տարօրինակ խաղեր է խաղում : Ռուսները դարերով յաղթական մուտքի են սպասել, Այս Սոֆիայի խաչի առասպելն են ստեղծել եւ ամբողջ մի փիլիսոփայութիւն, մի տեսակ համատիեզերական աշխարհահայեացք՝ սուրբ գրքի, վօղկայի, մտրակի եւ ճգնաւորութեան մի իդէալ :

Այսօր, եկել են, բարոյալքուած բանակի այդ բեկորները, ընկել են փողոցէ փողոց, ծախում են լրագիր եւ լուցկի, ժպիտ եւ պար, նուրբ երաժշտութիւն եւ կին :

Լաւ են զգում իրենց, մանաւանդ մզկիթների շուրջը, թրքաց թաղերի բանտուած հարեմների ստուերների տակ, աժան եւ ստորին զուարճութիւններ մատուցող կասկածելի վայրերում :

Կանայք իրենց մսերի մէջ թրթռուն հեշտանք են դնում, բարեկիրթ շուսյտութիւն, գեղադիտական պոռնիկութիւն : Թուրք կանանց ձեւերն են առնում, բաղնիքների աւազանների շուրջ պտտող մերկութիւնների եւ կիսամութ սենեակների դաւաճան նուազումների հրապոյր են մատուցում : Աժան :

Մարդկանց մէջ բնածին թուլութիւնը, որ իրենք բարութիւն են անուանում, լճի վրայ թափուած իւղի պէս տարածուած է, կպչում մարմիններին, փոշու եւ աղբի բոյն դառնում :

Ռուս հոգեբանութիւնը ինչքա՞ն մակերեսա-

յին է : Ինչքան խեղճ են եւ անհատակութիւնից զուրկ : Մշակոյթների փրփուրը վայրենի շրթթունքների վրայ : Համեմներով խեղաթիւրուած մի տեսակ սոխի ապուր՝ աղիքները այրող եւ անմարսելի :

Խանութպան էին անուանում մեզ, արհամարհում էին, վիրաւորում, իսկ այսօր իրենք, Պոլսից մինչեւ Փարիզ, էլ ինչե՞ր չեն ծախում : Հոգի, մարմին, գողացած իրեղէններ եւ խիղճ :

Պէտք է սահման քաշել մեր եւ իրենց մէջ : Նրանց երեւութական քաղաքակրթական մրտայնութիւնից պէտք է պաշտպանուել :

Հայը գերազանցապէս հակառուս է :

* * *

Երեկոյեան, վերադարձին, հիւրեր դտայ տանը : Երկու երիտասարդներ, որ կովկասից են գալիս : Մէկը ասում է նկարիչ է, միւսը՝ բանաստեղծ :

Նկարիչը առատ է իր ճառերի մէջ, բանաստեղծը բացականչութիւններով է պատասխանում : Հարց ու փորձ եմ անում Հայաստանի մասին, շատ բան են ասում, բայց չեմ կարողանում կացութիւնը պարզել : Սիբիրական մի նոր լեզու են բանեցնում, մեզ համար անհասկանալի :

Դա էլ նոր երեւոյթ է, նոր մի հոգեբանութիւն յեղափոխութիւնից առաջացած :

Նկարիչը — Թիֆլիսեցու ճիւղնութեամբ — պատմում է, որ արտասահման գնալու համար եւրոպացիները մեծ դժուարութիւններ են անում, սակայն, իրեն ասել են մի միջոց, եթէ կաթոլիկութիւն ընդունի, միսիոնարները գործը կը սարքեն :

— Ուստի ի՞նչ էր մտադիր անելու, — հարցրի :

— Ինչ կայ որ, կ'ընդունիմ :

Այսօրուայ երիտասարդները ամէն բան ընդունում են, եւ ոչ մի բանի չեն հասնում :

Յոյց տուեց իր գծագրութիւնները : Նմանողութիւններ Լիօնարդօ տա Վինչիին, բայց նամակներից առած ընդօրինակութիւններ :

Խեղճութիւն :

* * *

Պէտք է Հայաստան գնալ :

Ինչքա՞ն հեռաւոր է թւում նա եւ ինչ անհասկանալի : Մեր եւ նրա միջեւ բոցերում ճարճատող Փոքր Ասիան, հակառակորդ բանակ-